

Fasnacht 2026



Basel-Ghyyslet

Z Basel isch allewyyl eppis loos,
eb im ene Museum oder uff dr Strooss,
ständig git s irgend en Event
zu däm denn alles aanerennt.
Eb em Bebbi sy Jazz in dr Innestadt,
au Rock uff em Flooss finde alli glatt.
In dr Solitudeaalaag e Gaischterbaan fir d Kumscht;
und im Kunschtmuseum Gaischter und Dunscht
und dr Kusama iiri Dupfe Creation
ziet alli uuse in d Fondation.
So hett im Herbscht e Kinschtlerbaar
e luschtigi Ydee, spannend und glaar,
sy wänn uff em Minschterplatz e Picknick mache
uff typische rot wyss ghyyslete Blache.

S goot nit numme drum, dass me zämme kunnt,
s hett alles au e diefere Grund:
mit dääne groosse Degge und Hyysli am Boode,
stelle die Zwai ganz wichtigy Frooge:
Groossghyyslet, so sett me dängge und handle
und die Gedangge in dr Gsellschaft umwandle.
Isch Basel ryff fir groossi Experimänt
oder blyybe mr stegge in de Fragmänt?

Waisch no die gschwungeni Calatrava Brugg,
voll Eleganz, verspiilt und e bitz verruggt?
Die hett kaine welle, vyyl z groossghyyslet dänggt,
s hett numme fir e Stääge im Fauteuil glänggt.
Oder s Aquarium, wo uff dr Heuwoog hätt aane selle,
vyyl z grooss dänggt, mee muess y nit verzelle.
Kai Glasbau fir e Fischli Zoo
s hett ee gnueg Beton ummestoo.
Drfiir hesch uff dr Dreyroosebrugg Kiibelpflanze,
das isch Stadtbegrienig, fir mee hett s kaini Finanze.
Um so besser kaasch im Summer in de Brunne baade,
so duet dr d Hitz nit z vyyl schaade.

Fir dr ESC macht Basel e groossghyyslets Fescht,
die ganzi Stadt isch voller Gescht.
Die danze und singe voller Gnuss,
aaber am elfi isch wägen em Läärmschutz Schluss.

Au d Idee vo dr drämmlifreye Innestadt,
finde gar nit alli glatt.
Drbyy soone richtige bunte Määrt,
Kaffi und Bänggli, wär scho ebbis wäärt.
Lieber e grieni Drämmliwand,
wo nit duure kunsch, daas hett Bestand.

Miir diskutiere iber Grättimensche und Maitlibai,
iber Bapyyrbindel, Bebbisegg und d Wöschoornig dehai,
eb dr Noochber sy Gaaraasch derf braiter mache
oder duet är sich grad mit alle vergrache?
Ibers Häärzstigg oder d Spitalbolitigg
oder e Parggplatzregime, wo s fascht kaini Parggblätz me git.
Mr bikemme kai Hallebaad aane oder e Roger Federer Halle,
will immer eppis ebberem nit duet gfalle.
Groossi Ydee, aber denn isch nyt bassiert,
isch Basel jetz grooss oder glaikariert?

Aber in aim isch Basel wiirgglig famoos,
deert sinn d Hyysli schampar grooss;
Unseri Fasnacht läbt nämmlig vo all dääne Sache,
iber die mr uns denn kenne luschtig mache.
Eb Clique, Guggemuusig oder Schnitzelbangg,
mr spiile das uss und mache Gstangg.
Und so isch zletschtamänd jeedi groossi Ydee
immer no guet fir e Fasnachtsujet.

D Ladäärne-Uusstellig uff em Minschterplatz und d Waage- und Reggwisyte-Uusstellig
bi dr Kasäärne sin vom Määntig znacht bis am Mittwoch demoorge! Deert und an de
Verkaufsständ (CINS) in dr Stadt ka men au alli Zeedel, Schnitzelbängg und d Blaggede
kaufe. Fasnacht für alli zum Kennelehre und Usprobieren. Do findsch alli Informatione: jetzt-fasnacht.ch D Zeedellääsede isch am Sunntig noob dr Fasnacht 2026, am 01. Meerz, vom
Finfi bis am Siibeni zoobe, in dr Baseldytschi Bihni (im Lohnhof 4). D Foyer-Bar isch vom
Vieri ewägg offe und dr Ydritt isch frei.